



## Kielelezo cha Utii

**A**lipoonekana ana umbo kama mwanadamu, alijinyenyekeza akawa mtii ahata mauti. —**Wafilipi 2:8.**

Kwa kuwa Yesu alikuja kuishi nasi, tunajua kwamba Mungu anafahamu majaribu yetu na anashirikiana nasi katika huzuni zetu. Kila mwana na binti wa Adamu anaweza kuelewa kwamba Muumba wetu ni rafiki wa wenye dhambi. Kwa kila fundisho la neema, kila ahadi ya furaha, kila tendo la upendo, kila mvuto wa kiungu uliodhihirishwa katika maisha ya Mwokozi duniani, tunamwona “Mungu pamoja nasi.”

Shetani anawakilisha sheria ya upeendo ya Mungu kama sheria ya ubinafsi. Anadai kwamba haiwezekani kwetu kutii kanuni Zake. Kuanguka kwa wazazi wetu wa kwanza, pamoja na mateso yote yaliyotokana na hilo, yeye anamlaumu Muumba, akiwashawishi wanadamu kumwona Mungu kama mwanzilishi wa dhambi, mateso, na kifo. Yesu alikuja kufunua udanganyifu huu. Kama mmoja wetu, alitoa mfano wa utii. Kwa sababu hii, alichukua asili yetu na kupitia uzoefu wetu. “Ilimpasa kufananishwa na ndugu zake katika mambo yote” (Waebrania 2:17).

Ikiwa tungepaswa kupitia chochote ambacho Yesu hakukipitia, basi kwa jambo hili Shetani angewasilisha nguvu za Mungu kama zisizotosha kwetu. Kwa hiyo, Yesu “alijaribiwa sawasawa na sisi katika mambo yote” (Waebrania 4:15). Alivumilia kila jaribu tunalokutana nalo. Na hakutumia nguvu yoyote kwa niaba yake mwenyewe ambayo haiwezi kutolewa bure kwetu. Kama mwanadamu, alikabiliana na majaribu, na kushinda kwa nguvu alizopewa na Mungu. Anasema, “Kuyafanya mapenzi yako, Ee Mungu wangu, ndiyo furaha yangu; Naam, sheria yako imo moyoni mwangu” (Zaburi 40:8). Alipozunguka akitenda mema na kuponya wote waliokuwa wakiteswa na Shetani, aliwafunulia wanadamu tabia ya sheria ya Mungu na asili ya huduma yake. Maisha yake yanathibitisha kuwa inawezekana kwetu pia kutii sheria ya Mungu.

Kwa ubinadamu wake, Kristo aligusa ubinadamu; kwa uungu Wake, alishikilia kiti cha enzi cha Mungu. Kama Mwana wa Adamu, alitupatia mfano wa utii; kama Mwana wa Mungu, anatupatia nguvu za kutii.

Kristo ndiye aliyesema kutoka katika kichaka kilichokuwa kwenye Mlima Horebu akimwambia Musa, “MIMI NIKO AMBAYE NIKO.... akasema, ndivyo utakavyowaambia wana wa Israeli; MIMI NIKO amenituma kwenu” (Kutoka 3:14). Hii ilikuwa ni ahadi ya ukombozi wa Israeli. Kwa hiyo alipokuja “katika mfano wa wanadamu,” alijitangaza kuwa MIMI NIKO. Mtoto wa Bethlehemu, Mwokozi mpole na mnyenyekevu, ni Mungu “aliyedhihirishwa katika mwili” (1 Timotheo 3:16) (The Desire of Ages, 24).